

Date – 21/04/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Agriculture Minister Pu PC Vanlalruata'n vawiin atangin sorkar-in sawhthing a lei chhonzawm leh dawn tih a sawi.
2. Aizawl Municipal Corporation (AMC) chu Bawngkawn a lirthei dahna tur a in chhawng sakna a cheng vaibelchhe 7 leh nuai 85 chuang felhlel taka hmanga puh an ni.
3. African Swine Fever (ASF) vawk pulhri hri leng avanga kumin chhunga vawk thi zat chu 2,527 a tling tawh.

<><><>

GINGER

Agriculture Minister Pu PC Vanlalruata'n vawiin atangin sorkar-in sawhthing a lei chhonzawm leh dawn tih a sawi.

He thu hi tunhnai a chanchinbumi thenkhat hnenah sawiin Agriculture Minister chuan kumin February ni 20 atanga March ni 20 inkarah Sorkar chuan Mizoram hmun hrang hrangah Sawhthing kg.-ah cheng 50-in a lei khawm a ti a, tun dinhmunah quintal 6,222 hralh a ni tawh tih sawiin hralh loh quintal 1,800 vel a la bang a ti a. Sorkar-in Sawhthing a lei khawlte chu a lei chhawngtute'n lilama an chhan ni mah se, a leitu zingah Mizoram lam hawi an tam loh avangin an hralh chak thei lo tih a sawi.

Pu PC Vanlalruata chuan sawhthing chingtute manganna chu sorkarin a hria ni a sawiin he mi sutkianna atan vawiin atangin sawhthing chu sorkar-in a lei tan leh dawn a ti a. Hei hi kut hnathawktu, sawhthing lo cho lawk tawhte chhanchhuahna tur a ni tih sawiin, tuna sorkar-in sawhthing a buaipui ang hi Mizoram-ah a la awm ngai lo a ti a. Tuna an buai chhan ber chu an vawi khatna a nih vang ni a sawiin tuna an harsatna tawh ang chu nakkum lamah a tlem tawh a rin thu a sawi bawk a ni.

<><><>

LUNGLEI

Food Civil Supplies & Consumer Affairs Deptt hnuai Ration Card ennawn, siamthat kalpui mekah khua a awm tawh lo leh mithi tawh paih a ni a, Lunglei DCSO hnuai Public Distribution Centre(PDC) 10 awmin nikum June 2024 leh kumin February 2025 inkar, thla 9 chhungin buhfai mamawh Qtls 1074 in a tlahniam. June 2024-ah khan quintal 12740 vel sem a ni a, February 2025-ah chuan quintal 11670 vel sem a ni .

Hetihlai hian Retailer nilai, chhan engemaw avanga bang emaw inthlak emaw ten an buhfai hralh bang, a thar hnenah hnutchhiah tur a tih chu DCSO Lunglei a thawktu te chuan enfiah chho mekin Inrinni khan Zohnuai leh

Zotlang a Retailer te DCSO Pu Lalremruata Sailo hovin an endik a, an endik naah hian buhfai hnutchhiah lo an awm tih hmuhchhuah a ni.
Kan corr report lo ngaithla ang.

DCSO Lunglei chuan Retailer nilai te an term a tawp hian retailer an nihlai a buhfai la hman lo te buhfai lak tur kha a bo thiang lova, zinbo vang emaw a buhfai a lak hman loh kha a dawt leh thlaah a chanvo kha a awm reng dawn a, a chanvo lak tur kha Retailer in a hralh emaw anih chuan a lehpok ah a quota kha pek tel anih tawh dawn loh avangin Retailer ten duh duh a an lo tih riral kha a theih loh a ni tih sawiin Retailer hlui ten a thar hnenah hralh bang pe/khul tir ve mai turin a hriattir. Kumin March thla chung khan Retailer 25 an chawl a, April-ah hian 30 vel an chawl leh ang a, October-ah a hlawp in Retailer te hi inthlak tur a ngaih a ni a ti.

Hetihlai vek hian buhfai phurtu ten buhfai an ti chingpen ni a hriat anih vanga Lunglei PS-a FCS&CA Deptt. in FIR an thehluh chungchangah Police ten Investigation kalpui mekin a mawhphurtu awm ang leh a lo lei chhawngtu pawh an hre deuh tawh ni a thudawn a ni. Hemi kaihhnawihah hian Buhfai phurtu Driver 4 vel bakah a lo leitu leh Official te pawh an inhnawih ngei ni a rin a ni tih thudawna chuan a sawi.

<><><>

VEHICLE FITNESS

Aizawl District Transport office hnuaia Motor Vehicle Enforcement Staff-te chuan tun thla, April ni 1 atanga Inrinni thleng khan, lirthei document hrang hrang fel lo 302 manin, lirthei document 47 an hren sak.

MVI Enforcement staff-ten lirthei an endik zingah LMV lirthei ke pali nei-mimal car leh a dangte an man tam ber a, lirthei endik zingah document fel lo, chhiah leh Insurance fel lo bakah, driving licence nei lo leh fel lote an man tam ber a, khualzin phur Maxi cab 32 an man bawka bungraw phur chi lirthei te 60 an man bawk. Lirthei an man atanga pawisa an chawitir tlingkhawm chu cheng nuai 11, aing 7 leh sang 4 a tling a ni. MVI Enforcement staff te hian lirthei 1,057 an endik thu an sawi.

Enforcement staff te chuan document felfai nei lova lirthei khalth chhuah chu dan phal loh a nih bakah, chetsual an tawh palh emaw mi an tipalhin emaw-in insurance a hmuh theih loh thu an sawi a. Harsatna lian zawk an tawh theih avangin document felfai nen chauha lirthei khalth chhuak thin turin lirthei neitute an chah a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

AMC

Aizawl Municipal Corporation (AMC) chu Bawngkawn a lirthei dahna tur a in chhawng sakna a cheng vaibelchhe 7 leh nuai 85 chuang felhlel taka hmanga puh an ni.

Local fund audit on the accounts of local authorities director report atanga a lan danin AMC hian Bawngkawn a Sairang peng bulah Atal Mission for Rejuvenation & Urban Transformation (AMRUT) hnuaiah lirthei dahna chhawng (multi-level parking) din turin ruahmanna an siam a. He in sakna atan hian a tira hnathawktu (contractor) nena an inremna aia za zela 226 dawn sum sen a ni. Audit report-in a tarlan danin lirthei dahna tur sakna hmun hi Lalbiakdiki ram a ni a (metre 275 point 80 biala zau LSC No. 182 of 1980 leh metre 299 point 28 a zau LSC No. 306 of 1980 te a ni). Ram neitu nen hian November ni 22, 2016 khan inremna siam a ni a. He in sakna atana senso tura a tira ruahman chu cheng vaibelchhe 2, nuai 63, sing 9, sang 1 leh 812 a nih laiin sum ruahman hi cheng vaibelchhe 8, nuai 59, sing 8, sang 1 leh 032 a tihpun chhoh a nih thu audit report chuan a sawi a. A tak taka he lirthei hunna tur in sakna atana senso chuan cheng vaibelchhe 7, nuai 85, sing 8, sang 5 leh 613 ni-in auditor-te chuan an sawi a ni.

AMRUT-in a tum chu mipui mamawh chi hrang hrang - tui, tui paihna felfai, khawpui a veivahna leh hahdamna hmun (park) te din a ni a, hei hi mirethei zawkte leh rualban lote tana a bika ruahmanna pawh siam tur a ni. Chutiang a nih lai chuan he lirthei dahna in an sakna-ah hian AMRUT inkaihhruaina hi zawm a ni lo niin audit report chuan a tarlang a. Inremna an siamah chuan he in hi kum 30 atan tih a nih lai-in audit a nih hun lai kum 6 hnu-ah pawh he in atang hian AMC in cheng khat pawh a la hmulet lo mai ni lovin tun thleng hian he lirthei dahna inchhawng hi hman tangkai a la ni lo a ni. Chuvangin cheng vaibelchhe 7 leh nuai 85 chuang senna hi tul lova mipui sum senralna mai niin audit report chuan a tarlang.

Hei bakah hian an inremna point 6-na angin ram neitu hian AMC in sakah hian kaw khat chu ama pualin dawr atan a hmang a, AMC hian engtin mah an ti lo niin tarlan a ni a. AMC thuneitute chuan he lirthei dahna in chhawng hi a tirah AMRUT sum hmanga sak an tum na a AMRUT sum hi an hmang leh ta lo niin an sawi a. Chu bakah August ni 4, 2022 a AMC executive council thukhawm chuan lirthei dahna in chhawng hi AMC Plaza, Bawngkawn ti-in a hming an thlak thu an sawi bawk a. February ni 15 2024 khan AMC Plaza hi Zote Projects, Zarkawt-in kum thum chhung atan inremna ziah a ni a. Thla tin cheng nuai 3 sing 8 chawi a luah hawh tura inremsiamin, kum 20 chhung a kumtin za zela 5 a luah man pung turin an inrem a ni.

AMC insawifiahna hi auditor-te chuan an pawm lova, kum 6 chuang hman tangkai lohva cheng vaibelchhe 7 chuang senna hi sawi mam theih a nih loh bakah a ram neitu-in he building chhunga ama dawr a lo siam ngawt hi thil felhlel tak a ni an ti bawk.

<><><>

ASF

African Swine Fever (ASF) vawk pulhri hri leng avanga kumin chhunga vawk thi zat chu 2,527 a tling tawh.

Vety department hotute sawi danin nimin khan vawk 33 a thi a, Siaha khawpui veng 12-ah 30 a thi a, Lawngtlai khawpui a AOC vengah 3 a thi bawk. Nikum December thla ni 24 atanga ASF vawk pulhri avanga thi leh suat awm lova ni 80 chuang a awm hnu-ah kumin March thla laihawl atang khan Mamit district a Zawlnuam khua leh Lawngtlai-ah vawk thi a awm tan a. Vawk thi leh damlo sample an lak chu ASF vawk pulhri ngei a ni tih March ni 20 khan Guwahati a laboratory-ah finfiah a ni a. Hemi hnu hian district 4 – Siaha, Lawngtlai leh Lunglei khawpui bakah Zawlnuam khua-ah thi an awm chho ta zel a, tunah hian veng 44 chu ASF vawk pulhri lenna a puan a ni.

Tun thlengin ASF avang hian Siaha khawpui-ah vawk 1,347 a thi tawh a, Lawngtlai khawpui-in dawtin vawk 1,001 a thi tawh a, Zawlnuam khua-ah 166 thi tawhin Lunglei khawpui-ah 13 a thi tawh bawk a ni.

He tih lai hian ASF pulhri a darh zel tur venna atan vawk 873 suat a ni tawh a. Siaha khawpui-ah 520, Lawngtlai-ah 297, Zawlnuam khua-ah 33 leh Lunglei khawpui-ah 22 suat a ni tawh a ni.

<><><>